

Youz Bwzma

□ Luz Vanjinh /陆婉珍

It

Seizhah ngoenz ndeu, baengz-youx naeuz yienh dou Nanzbingz Yauzcuz Yangh laebbaenz seiqcib bi lo, bienqvaq gig hung, de yaek bae caijfangj, heuh gou caez bae youz. Dinglingz gou cingq cuengqgyaj, dou gangj bae couh bae. De hai ci, daij geij boux baengzyoux caez coh Mbanjyauz ndaw Sizvandasanh bya hung lueg laeg haenx bae.

Mbanjyauz youq Nanzbingz Yauzcuz Yangh ndaw yienh dou, seiqcib bi gaxgonq couh laebbaenz Nanzbingz Yauzcuz Yangh. Ranghdieg neix youq ndaw Sizvandasanh daj baihdoeng yienq baihsaenamz iet bae, dwg aen doudangq dienseng Sangswh Yen, ndigah couh heuhguh “Nanzbingz”. Gizneix bya sang dieg nit, daengx yangh cawz song aen hingzcwngcunh dwg dieg bo, gizyawz cungj youq ndaw laeg Sizvandasanh. Baezneix dou yaek bae Nanzbingz Yauzcuz Yangh Cangzlungz Cunh Mbanjbwzmaj youq haemh ndeu, ndeindei youz mbat ndeu.

Aiq dwg aenvih daj iq couh youq dieg minzczu lai majhung, gou doiq gak minzczu fungsug cungj gig haeujsim, baez ndaejhoengq, couh haengj bae damqra gig daegsaek fungsug sibgvenq gak minzczu. Caemh bae dijvei gyoengq beixnuengx gak minzczu doxgyau doxyungz haenx. Caendang bae gamjsouh gak minzczu beixnuengx youq ndaw seizdaih moq baenzlawz gvaqndei saedcej caeuq hwnghfat.

Dou itloh byaij, itloh yawj, cungj miz haujlai gingjsaek sawj dou simmaez. Dou hix gamjsouh daengz haujlai fungcingz Mbanjyauz.

Ngeih

Gizneix dienheiq raeuj, dieg-namh biz, bya sang ndoeng deih, vuzcanj fungfouq. Gyoengq beixnuengx Yauzcuz ndaw mbanj cujyau guh linzyez swnghcanj, gvej ieng-coengz, ndaem batgak, ndaem go-gviq, ndaem haexnaz. Ndaw bya dwzcanj hix gig fungfouq, miz raetlingzcih, raetmoenggaex, yiengh-

saenq, dangzrwi……

Gwnz roen, ci ndonj haeuj ndaw ndoengfaex ndaet seiz, gij rij vangraeh de mizseiz laecoemcoem youq laj faex hung, mizseiz heuxgeuj gvaq gij rin dah, gyongx coh bae laj. Dou hai cueng ci, naengh youq ndaw ci hix roxnyinh gij raemxrij liengzseuseu daj laj bya laj faex ndonj daeuj, sawj vunz simsangj vaiqvued.

Youq mwh aen ci hai hwnj gwnz loh ndoi sang, lwgda cix yawj ndaej youh langh youh gyae. Da muengh coh gyae bae, cij raen gyoengqbya deng fwnraq rwed gvaq haenx, engqgya heu rongh lo. Gij fwjmok daj byongh bya faex heusau haenx swng hwnjdaej, heuxgeuj bongh hwnj. Giz mbang lumj seiyouz biufiegfig, giz na lumj saisei hausagsag, cwxcaih mbin dwk mbaeumbengmbeng, mokmumu, lumj dieg sien nei, caeuq gij gyaeu gij ndoi heu, caeuq gwnz mbwn dujudj fwjhau haenx doxhab doxbouj. Gij ranzbezsu mbanj Yauzcuz mizbaez vangraeh doxcab daengj youq baihnaj, caeuq gij faex heu doxcw doxingj, yienghyiengh ciengxda, maezvunz, youh cwxcaih.

Sam

Banringzgvaq, aenvih dwg loh ndoeng, roen godgod goxgoh, ci dou hai le sam diemjung cij daeuj daengz Mbanjbwzmaj goujcib bet goengleix gyae neix.

Mbanj neix youq Nanzbingz Yauzcuz Yangh Cangzlungz Cunh. Geij bi neix daeuj, miz hek daeuj gizneix youz lai, gyoengq beixnuengx Yauzcuz mbanj neix miz haujlai ranz mboujdan hwnj ranz moq guh bouqhek, vanzlij guh nungzgyahloz ceuj byaek daih hek dem, youq ranz cungj miz souhaej, saedcej ngoenz beij ngoenz ndei. Haemhneix dou couh youq gizneix dozyouq, cimz gij byaekfeih Yauzcuz, caijfangj gyoengqde, gyalag gamjsouh gij fungsug cinghseuq lauxsaed gyoengqde.

Gaenh geij bi neix daeuj, Mbanjbwzmaj aenvih guh naz-mbaeklae, banh ciet fungsou, mingzdaez cienz bae gyae’ gyanggyang.

Haujlai vunz aenvih mingzdaez haenx daeuj gizneix yawj nazmbaek-lae hunggvangq. Gyoengqvunz nyienh byaij gvaq cien bya fanh dah hix aeu daeuj yawj gij yiengh gyaeu de mbat ndeu.

Hoeng geij bi gonq gig hojsik, gyoengq vunz lai yawj gij gingjsaek gyaeunde gvaq le, cix vih gwn ninz yousim. Aenvih dieg neix dwg ndaw bya laeg Sizvandasanh, gyoengq beixnuengx Yauzcuz miz gwn miz daenj, hoeng, gij lijyouz fuengmienh lij caengz gaih faz baenz yiengh, lij caengz banh miz bouqhek, cawzliux huqdoj, gij yungh gij gwn hix noix di.

Bouxyouz mbouj miz banhfap, cijndaej dungxiek ngaungau hai ci daj ndaw ndoeng loh raez van lai haenx, hai sam diemjung ci dauq daengz yienhsingz ra ngaiz gwn ra dieg youq.

Vih gaijgez gij vwndiz neix, dangdieg cwngfuj caeuq cunhvej cijdauj gyoengq vunzmbanj dawz ranz guh baenz ranz bouqhek, banh baenz lai aen nungzgyahloz. Yienghneix gyoengq bouqhek daeuj youz gij gwn gij youq mbouj yungh you lo.

Seiq

Banhaemh, dou comz youq ranz ndeu gwn haeux, mboujlwnh Boux-cuengh roxnaeuz Yauzcuz, daihgya cungj miz gangj miz riu. Gij vah riuangq haenx cungj heux youq ndaw daizhongh caeuq ndoengfaex baihrog.

Dou cimz gvaq byaekfeih Yauzcuz le, mbwn hix menhmenh laep lo.

Geij boux cozyah caeuq gicej miz ginghyen haenx caeux couh ndonj haeuj ndaw laep bae ra vunz caijfangj, baez yaepda couh mbouj raen ngauez gyoengqde lo.

Dou geij boux cijndei doxgaen youq ndaw mbanj youzbyaij. Itloh doq byaij doq cimh, yawjyawj ra dawz saek ranz beixnuengx Yauzcuz souhong caeux, gwn caeuz liux ndaejhoengq le, couh haeuj bae ganggangj goj.

Dinglingz henz loh miz aen bouqdiemq iq ndeu, gou raen meh lauxbanj hauxseng ndeu cingq youq bakdou mad deih, gwnz dieg rog dou caeuq ndaw rug cungj mad ndaej

ronghrikrik, ingj gij rongh daeng gwnz ranzdingj lwenqda raixcaix.

Din gou mbouj rox mbouj nyinh coh de byaij gvaqbae, caeuq de doxdongx. Meh lauxbanj hix sim-hoengz riunyumj iu dou haeuj ndaw diemq bae naengh, vanzlij yungh huzcaz daeuj bauq caz ndei hawj dou dep dem.

De ndang byom loq iq di, yiengh gyaeu youh unqswnh, youh daihfueng. De cimq caz hawj dou geij bouxhek, caeuq dou ganggoj doenghij saeh neix cungj yienh’ok de yienghyiengh habngamj, mbouj nyanq saekdi. Dingq de gangvah, dou rox de singq Ciengj, samcib lai bi, hix dwg vunz Yauzcuz, daj mbanjnden haq gvaqdaej, gaenq miz song dah lwg, dah hung gaenq hwnj cuhcungh, dah iq ngamq doeg siuyoz sam nienzgaep. Dou youq henz de rox le haujlai goj Mbanjyauz.

Haj

Seiqcib lai bi gaxgonq, dingz lai beixnuengx Yauzcuz ndaw lueg ndaw bya cungj youq gij ranzhaz gaebgeb, daemqdet, cumxcwcdwd haenx. Ciengj lauxbanj couh youq ndaw ranzhaz doekseng majhung. Cig daengz bi 1984, Nanzbingz Yinzminz Gunghse gaij baenz Nanzbingz Yauzcuz Yangh le, gyoengqvunz vanzlij gvaq gij saedcej gungzhoj yienghneix.

Ngamq laeb yangh codauez, aenvih gyaudoeng mbouj fuengbienh, gak boux beixnuengx yaek bae haw Nanzbingz, mbwn caengz rongh couh aeu hwnqdaej, bwh ndei daeng-meizyouz, yungh max doz gij huqdoj: Raetlingzcih, raetmoenggaex, yienghsaenq, dangzrwi…… cix hwnjdin laeh max ganj loh bae haw. Gyoengqde dawz gij huqdoj neix daengz haw bae gai, caiq cawx di doxgaiq gwn yungh haenx dauqma.

Hoeng, yaek ganj baez haw ndeu gig mbouj yungzheih, baedauq aeu byaij roekcib goengleix roenbya, yaek fan gvaq haujlai bya hung lueg laeg, yungh ngoenz ndeu haet bae haemh dauq, song gyaeuj cungj dwg mbwn laep cij ndaej dauq daengz ranz.

Roenbya song henz cungj miz nywj haz, ngoenz mbwn gvengq, gij faenx namh henj riengz din max din vunz mbinfwgfwg; ngoenz fwn loh boengz youh bangzbwdbwd, vadlulu, byaij hoj dangqmaz. Gij doxgaiq cawx dauqma haenx yungh daehsuliuek suek ndei, mbouj hawj fwn rwed cijndaej. Gij nohmou cawx baenz gaiq hung, seizhah oemq nanz cungj haeu. Gyoengqvunz couh dawz nohmou heh baenz diuz iq, youh aeu gyu nu hwnjbae iep. Yienghneix vanzlij haeu di, hoeng hix dinggaz gwn lo. Aenvih youq nienzdaeh noix gwn noix daenj haenx, ndaw ranz ciengx duz mou ndeu aeu caj daengz ndwenlab cij sij ndaej gaj daeuj guh nohlab gvaq cieng.